

չըջանի կառավարական գործերը, բայց, իրօք, դարձաւ միայն Ղարաբաղի իշխանութիւնը: Հայերն ու թուրքերը համերաշխ էին. գաւառի հայկական մասերում ղեկավարում էին հայերը, թրքականում՝ թուրքերը: Անգամ հոկտեմբերեան յեղաշրջումից և Երևանի, Կարսի, Գանձակի ու Բազումի թրքական շարժումներից յետոյ էլ անգործութիւնը Ղարաբաղում չխանգարուեց:

Այսպէս տեւեց դրութիւնը մինչև 1918 թւի ամառը, երբ լուծւեց Անդրկովկասի միութիւնը, Կովկասում երևացին թիւրքերը, և Նուրի փաշան Գանձակում ձեռնարկեց իսլամական բանակի կազմակերպութեան: Միջկուսակցական բիւրօն՝ չկամենալով ենթարկւել նորաստեղծ Ադրբէյջանին՝ որոշեց կազմել տեղական ինքնուրոյն իշխանութիւն և իր տեղը նշանակեց կոմիսարների խորհուրդ անունով մի մարմին, խառն՝ հայերից ու թուրքերից: Իսկ մի ամիս անցած էլ այս մարմինը փոխարինւեց ազատ Ղարաբաղի Ժողովրդական կառավարութեամբ:

Սակայն, թիւրք-ադրբէյջանեան սադրանքների հետևանքով հետզհետէ Ղարաբաղի կեանքն էլ խառնափնթորւեց: Անիշխանութիւնը սկսեց գլուխ բարձրացնել ամէն կողմ: Եւլախ—Շուշի ճանապարհը փակւեց հայերի առջև: Մի շարք վայրերում թուրքերի կողմից տեղի ունեցան հայերի թալան ու սպանութիւններ: Իրենց հերթին, հայերն էլ պատասխանում էին նոյն ձևով. ռուսական ռազմաճակատից վերադարձած զինուորները կամ սովաճար գիւղացիք, յաճախ, յարձակւում էին քոչւորների վրա՝ թալանի և կողոպուտի նպատակով: Բայց և այնպէս, հայ և թուրք ղեկավարների ջանքերով, մինչև 1918թ. ամառը ընդհանուր խաղաղութիւնը չխախտւեց: Շուշի քաղաքում իրար յետևից հրաւիրւեցին երեք խառն համագումարներ, որոնք նպաստեցին հայ-թրքական բարեհարեանական յարաբերութիւնների պահպանման:

Դրութիւնը փոխւեց արմատապէս, երբ Ղարաբաղի հորիզոնի վրա երևացին թիւրքերը: Թիւրքական մի բրիգադ, Ջէմիլ Ջահիդ բէյի հրամանատարութեան տակ և տեղական թուրք բէգերի առաջնորդութեամբ, Եւլախից, ուղղւեց դէպի Շուշի՝ ճանապարհին ուժեղացնելով ու զինաթափելով հայկական զիւղերը: Միաժամանակ յարձակման ենթարկւեց ու ոչնչացւեց Շուշիից դէպի Չանգեզուր տանող ճանապարհին ընկած Ղարաղլլաղ հայկական մեծ գիւղը, որը չաղկապի դեր էր կատարում Ղարաբաղի և Չանգեզուրի միջև:

Համաղարաբաղցիական երրորդ համագումարը, որ տեղի ունեցաւ սեպտ. 18—20—ին, Շուշիում, թիւրքերի յառաջխաղացման առթիւ, որոշեց չդիմադրել և ընդունել Ադրբէյջանի իշխանութիւնը: Սեպտ. 26—ին թիւրքերը առանց կռիւ մտան Շուշի և անմիջապէս զինաթափ արին հայերին: Այս բանը սաստիկ գրգռեց հայերին, և երբ թիւրքերը տեղափոխուած էին գրաւած գէնքերը, նրանք յարձակւեցին ու զրաւեցին, որի պատճառով թիւրքերը կախեցին երեք հայեր: Հոկտ. 1—ին, զինաթափութեան յաջորդեցին ձերբակալութիւններ. բազմաթիւ հայ գործիչներ բռնուեցին ու նետուեցին բանտ: